

關愛的故事

 香港社會服務聯會
The Hong Kong Council of Social Service



跨境婚姻

香港男多女少，唔少香港嘅男士都北上娶妻，跨境婚姻愈來愈多。根據報紙所講，過去廿年，香港一共有 48 萬人係有中港婚姻，佔婚姻總數超過一半，而跨境婚姻嘅離婚率亦超過五成，即係平均每兩對中港夫婦，就有一對離婚。我就係其中一個。

我係一個新到港嘅新移民，屬於高齡結婚一族，鄉里介紹我同一個港人認識，無幾耐就結婚生子。其實我識我老公嗰陣，大家都唔係咁認識對方，佢亦好少講嘢香港嘅生活。

我地分隔咗四、五年，先至等到有單程證嚟香港團聚。我嚟到之後，先知我老公嘅環境係點，真係覺得有啲俾佢厄咗。咁啱呢個時候佢又被老闆炒魷魚，脾氣變得相當暴躁，仲時不時郁手打我，而且仲迫我搬走，大家卒之離婚收場。

我婚姻失敗，仔女又細，喺呢個時候我又驗出患上乳癌，我來港未夠七年，未有資格攞香港嘅福利，我都唔知點算，淨係識得日喊夜喊。

好在有好心人教我搵社工，又搵報社刊登我嘅故事，有讀者仲慷慨捐出善款救我一命，我真係衷心多謝佢地。我亦好多謝跟進我個案嘅社工，佢不斷俾我支持同安慰，鼓勵我撐落去。因為呢個希望之光，令我睇到人間仲有溫情。

(446 字)